

Ukukhubazeka akuwaqedanga amaphupho

CHARLES KHUZWAYO

NGESIKHATHI umpetha wethenisi onokukhubazeka uLucas Sithole eshayiswa yisitimela eneminyaka engu-12 eDunhauser, walahlekelwa yimilenze yomibili nengalo yakhe yangokwesokudla.

Yize kunjalo kodwa lokho kukhubazeka akuwaqedanga amaphupho akhe.

Kunalokho walubalubela izinto ezinkulu. Lo mdlali ungomunye wezingalabutho zakuleli ezizokhonjiswa kusasa ohlelweni i-21 ICONS kuSABC 3 ngo-7.27 ebusuku.

Kulama-documentary, azobe ekhonjiswa okwesithathu, kusuke kuthulelwa isigqoko izingwazi ezibambe iqhaza emikhakheni ehlukehlukehene. USithole owazalelwa oSizweni, eNewcastle ngoSeptemba 30, 1986, ungomunye wabantu abakhuthaze intsha nabantu abanokukhubazeka kuleli nasemazweni angaphandle.

Kulezi zinsuku ubambe elikhulu iqhaza ekugqugquzeleni abantu abakhubazekile ukuba nabo

babambe enkulu indima emdlalweni wethenisi.

Uyisishosovu esilwela ukuba kuphele ukucwaswa kwabantu abanokukhubazeka futhi kuyekwe nokuba badatshukelwe ekubeni benengqondo namakhono. Ukholelwa ukuthi ukube akakhubazekanga, futhi uNkulunkulu akamnikezanga lesi sihlalo, ngabe akakwazi ukukhuthaza intsha nabantwana abanokukhubazeka.

Ubanikeza ithemba lokuthi impilo iyaqhubeka ngisho usuhamba ngesihlalo esinamasondo.

Kule filimu kuzobuye kukhonjiswe isithombe esibizwa ngokuthi yi-Against The Odds, esinoSithole esenkundleni yethenisi, ephethe i-racquet adlala ngayo esandleni futhi ehleli esihlalweni sakhe.

USithole yindoda ephelile futhi eshadelwe nguNontobeko Ngobese oyindodakazi yelungu leqembu likamaskandi, Izingane Zoma uTholakele futhi yena nomkakhe babusiswe ngendodana enonyaka uThabiso. Naye ungumculi kamaskandi ongumholi weqembu elibizwa ngaMathalente Amahle

futhi basanda kukhipha i-albhamu esihloko sithi Ezintabeni. KumaSouth African Traditional Music Achievement (Satma) Awards uSithole uqokwe emkhakheni weBest Necomer, adlana kuyo imilala noBahubhe, Angie M, The New Beam Brothers, Team Nyanye, Thandokazi nabanye. Uma ungakaze wambona uSithole enza adume ngazo esteji, kuzomele ungaphuthelwa yiMaskandi Experience eMoses Mabhida (People's Park) eThekwini ngo-Okthoba 10. Kulo mcimbi uzobe eshiyelana inkundla noShwi NoMtekhala, Khuzani Mpungose, Mjikijelwa, Ichwane Lebhaca, Imfezemnyama, Ama-SAP, Qhoshangokwenzakwakhe, Ngelo V, Osaziwayo, Thokozani Langa, Buselaphi, Umajotha, Igokama Elisha, Amathelente, Sgwebo Sentambo neThwasa Lekhansela.

Uhlelo luzobe luphethwe ngabasakazi boKhozi uNgizwe "Zulu Charmer" Mchunu, uBheka "Beekay" Mchunu nomsakazi weZululand FM uNonhlanhla "Mdonso" Ngcobo. Amathikithi aseyalholakala eComputicket naseShoprite/ Checkers ngo-R100.



ULUCAS Sithole emele iNingizimu Afrika kwi- International Wheelchair Tennis e-Ellis Park eGoli ngo-2012